

Ang Pagpili ni Ruth sa Iyang Tumong, Paggamit sa Iyang Katungod, Pagpangita sa Iyang Pahulay, ug Pagdawat sa Ganti alang sa Pamatigayon sa Dios

Basahong Kasulatan: Ruth 1—4

- I. Basahon ang Mga Maghuhukom sa makaluluoyng kasaysayan sa Israel, nga ngitngit ug baho; ang Ruth, nga pakapin sa basahon sa Mga Maghuhukom, rekord sa maayo kaayong sugilanon sa magtiayon, nga masanagon ug nangalimyon; ang ulohanong tawo ning sugilanona, si Ruth, samag lirio nga nitubo sa kasampinitan ug masanagong bituon sa ngitngit nga gabii—Ruth 1—4.**
- II. Naghisgot ang capitulo 1 sa basahon sa Ruth sa pagsimang ni Elimelech sa pahulay sa pamatigayon sa Dios (vv. 1-2), sa pagbalik ni Naomi sa pahulay sa pamatigayon sa Dios (vv. 3-7, 19-22), ug sa pagpili ni Ruth sa iyang tumong (vv. 8-18):**
 - A. Basahon sa pahulay ang Ruth; ang pahulay sa Igpahulay mao si Cristo nga atong pahulay, nga gihulagwayan sa maayong yuta sa Canaan—Deut. 12:9; Heb. 4:8-9:
 1. Nipahulay ang Dios sa ikapitong adlaw kay nakab-ot na man Niya ang Iyang gitinguha; ang gitinguha sa kasingkasing sa Dios pagpakabaton mag tawo dinhi sa yuta nga magpadayag Niya sa Iyang dagway ug morepresentar Niya gamit ang Iyang pagbulot-an—Gen. 1:26-28; Rom. 8:28-29; 2 Cor. 3:18; Rom. 5:17, 21; Bug. 5:9-10; 22:5.
 2. Sa Daang Tugon pahulay ang maayong yuta kay matukod man didto ang templo; ang templo maoy kinataposang kahingpitan sa pagsulod sa mga anak sa Israel sa maayong yuta; pinaagi sa templo mabatonan sa Dios ang mopadayag ug morepresentar Niya alang sa Iyang gingharian, pangagamhanan, ug administrasyon—1 Hari 8:1-11.
 3. Pahulay si Cristo sa mga balaan sa tulo ka hugna:
 - a. Sa panahon sa iglesia ang langitnong Cristo, ang nagpadayag, nagrepresentar, ug nagtagbaw sa Dios ug nipahulay sa Iyang buhat ug nilingkod sa tuong kamot sa Dios sa mga langit, mao ang pahulay nato diha sa atong espiritu; ingon nga pahulay nato, Siya ang atong hingpit nga kalinaw ug bug-os nga katagbawan—Mat. 11:28-29.
 - b. Sa gingharian sa millennium, sa mawala na si Satanas sa yuta (Bug. 20:1-3), ipadayag, representahan, ug tagbawon ang Dios ni Cristo ug sa madaogong mga balaan; unya si Cristo ug ang gingharian mao ang mas hingpit nga pahulay sa madaogong mga balaan, nga mahimong mga masigkahari Niya (vv. 4, 6), ug moambit ug mopahimulos sa Iyang pahulay.
 - c. Sa bag-ong langit ug bag-ong yuta, sa mapasakop na Kaniya ang tanang kaaway, lakip na ang kamatayon, ang kataposang kaaway (1 Cor. 15:24-27), si Cristo, nga mobuntog-sa-tanan, maoy kinahingpitang pahulay sa tanang tinubos sa Dios hangtod sa eternidad.
 - B. Ang pagbiya ni Elimelech sa maayong yuta nagpasabot nga nisimang siya sa pahulay sa pamatigayon sa Dios, busa giputol niya ang iyang kaugalingon sa pamatigayon sa Dios; nisimang siya gikan sa Bethlehem, ang dapit nga matawhan sa moabot nga Cristo (Miq. 5:2; Luc. 2:4-7), sa Juda, ang kinamaayohang

bahin sa maayong yuta (Gen. 49:8-10; Exo. 3:8b; Deut. 8:7-10), ngadto sa Moab, sa nasod sa pagsimbag mga diosdos (Huk. 10:6).

- C. Ang pagpauli ni Naomi sa Balaang Yuta pagpauli man niya sa pahulay sa pamatigayon sa Dios gikan sa Moab, sa nasod sa pagsimbag mga diosdos, ngadto sa Juda, ang yuta ni Imanuel (Isa. 8:8) aron moabot sa Bethlehem, ang dapit nga natawhan ni Cristo (Ruth 1:19, 22); nipauli siya kuyog si Ruth, ang binalayeng gihatag sa Dios kaniya aron matuman ang Iyang pamatigayon kalabot ni Cristo (v. 22).
- D. Gipili ni Ruth ang tumong nga makaambit sa pagpahimulos ni Cristo uban sa mga pinili sa Dios, ug nahimo siyang importanteng gigikanan ni Cristo, nga nakatabang sa pagpahimugso ni Cristo nganha sa katawhan; kini ang pagpili niya sa Dios ug sa Iyang gingharian aron matuman ang pamatigayon sa Dios kalabot ni Cristo—Mat. 1:5-6.

III. Naghisgot ang capitulo 2 sa basahon sa Ruth ni Ruth, nga nibalik sa Dios gikan sa paganong kagikan niya, nigamit sa iyang katungod sa pag-ambit sa dagayang abot sa panulundon sa mga pinili sa Dios:

- A. Segun sa tulo ka pagkabutang niya nga dumuluong, kabos, ug balo, gigamit ni Ruth ang iyang katungod sa pagpanghagdaw sa alanihon; dili pagpakiluoy ang pagpanghagdaw niya; katungod hinuon niya kini.
- B. Ang balaod sa Dios kalabot sa pag-ani sa alanihon mao nga panalanginan ni Jehova ang mga anak sa Israel kon ibilin nila ang kadaplinan sa ilang mga uma ug ang mga hagdawonon alang sa mga kabos, mga dumuluong, mga ilo, ug mga babayeng balo—Lev. 23:22; 19:9-10; Deut. 24:19.
- C. Nituman si Boaz ning balaora, tungod niana nanghimatuod sa dakong pagtuo niya ni Jehova; sa pagbuot sa Dios, morag gisulat kining balaora alang sa usa ka tawo—ni Ruth.
- D. Maingon nga dunay katungod si Ruth nga makapahimulos sa abot sa maayong yuta sa pag-abot niya sa yuta, duna sab tay katungod nga makapahimulos ni Cristo nga atong maayong yuta sa pagtuo nato Kaniya; ang paggamit ni Ruth sa iyang katungod nga makabaton ug makapanag-iya sa abot sa maayong yuta nagtimaan nga sa pagtuo nato ni Cristo ug organicong nausa Niya diha sa “nagdugtong” nga espiritu nato (Rom. 8:16; 1 Cor. 6:17), magsugod gyod ta sa pagpursigir ni Cristo aron mabatonan, mapanag-iya, masinati, ug mapahimuslan nato Siya (Fil. 3:7-16).
- E. Nagpakita ang basahon sa Ruth sa paagi, posisyon, katakos, ug katungod sa mga makasasala nga moambit ug mopahimulos ni Cristo; segun sa pagtudlo sa Dios, kita nga nituo ngadto ni Cristo nahimo nang takos ug duna nay posisyon nga moangkon sa atong katungod nga mopahimulos ni Cristo (Col. 1:12; Bug. 2:7; 22:14).
- F. Isip sugilanon, matahom, makatandog, makapatuo, ug makabuntog ang basahon sa Ruth; sa nangalimyon nga sugilanon sa capitulo 2, upat ka hulagway ang gipasabot:
 - 1. Si Boaz, nga dato (v. 1), naghulagway ni Cristo, nga dato sa diosnong grasya (2 Cor. 12:7-9).
 - 2. Ang uma sa maayong yuta nga gisaad sa Dios (Ruth 2:2-3) naghulagway ni Cristo nga malangkobon-sa-tanan, nga maoy tinubdan sa tanang espirituhanon ug diosnong produkto nga sangkap sa kinabuhi sa mga pinili sa Dios (Fil. 1:19-21).
 - 3. Ang cebada ug trigo (Ruth 2:23) naghulagway ni Cristo nga materyal nga

himoong kalan-on alang sa Dios ug sa Iyang katawhan (Lev. 2; Juan 6:9, 33, 35).

4. Si Ruth, nga Moabihanon ug paganong makasasala nga nahilayo sa mga saad sa Dios (Deut. 23:3; itandi sa Efe. 2:12), nga gihatagan sa katungod nga moambit sa mga hagdawonon sa alanihon sa mga pinili sa Dios, naghulagway sa Gentil nga mga “iro” nga nagkapribilihiyong makaambit ni Cristo nga mga mumho ilalom sa talad sa pahat sa piniling mga anak sa Dios (Mat. 15:21-28 ug nota 1 sa v. 27).

IV. Naghisgot ang capitulo 3 sa basahon sa Ruth sa pagpangita ni Ruth sa iyang pahulay:

- A. “Niingon si Naomi nga iyang [Ruth] ugangang-babaye kaniya, Anak ko, mangita gyod kog kapahulayan alang nimo, aron magmaayo kini kanimo”—v. 1:
 1. Nakaamgo si Naomi nga si Boaz gyoy hustong tawo nga mabana ni Ruth; busa, “nagpaka-tigpataliwala” si Naomi aron dasigon si Ruth nga magminyo.
 2. Sama ni Naomi ang tinuod nga mga ministro sa Bag-ong Tugon kay dasigon man nila ang mga magtutuo ni Cristo nga mahigugma Niya nga ilang Pamanhonon aron himoon nila Siya nga ilang Bana—2 Cor. 11:2; Bug. 19:7; 21:9-10.
 3. Ang bugtong paagi nga makapahulay ta paghimo man nato ni Cristo nga Bana nato; kinahanglan makaila ta Niya nga atong Bana ug himoon Siyang Bana nato, magkinabuhi nga labing suod ug labing sandurot nga mokontak Niya—1 Cor. 2:9; itandi sa 16:22.
 4. Kon makigminyo ta ni Cristo, himoon Siyang Bana nato, mausab ang atong kinabuhi; makaamgo ta nga magmaunongon gyod ta nga asawa, ug makaton ta nga magpahimulos ni Cristo nga atong kinabuhi ug persona, maglakaw ug maggawi nga nausa Niya—2 Cor. 2:10.
- B. Sa naa na si Ruth sa maayong yuta ug nigamit sa iyang katungod sa pagpahimulos sa dagayang abot niini, nagkinahanglan pa siyang panimalay aron makapahulay siya; moabot lang kining pahulaya pinaagi sa kaminyoon:
 1. Bisan naluwas na tingali ta ug nahigugma sa Ginoo, aron maanaa tay panimalay nga kapahulayan nato makigminyo gyod ta ni Ginoong Jesus, himoon Siyang Bana nato, ug magkinabuhi uban Niya diha sa iglesia nga atong panimalay—Rom. 7:4; 2 Cor. 11:2; Efe. 5:25-27.
 2. Si Cristo nga Bana nato ug ang iglesia nga panimalay nato kompletong yunit man nga makapabaton natog husto ug igong pahulay (v. 32).
- C. Sa kahayag sa Mateo 1:5-6 ug 16, alang diay sa pagpadayon sa talaan sa mga ginikanan nga magpadangat ni Cristo ang pagpangita ni Ruth sa iyang pahulay.
- D. Gisultian ni Boaz si Ruth, “Kabanay ko, apan dunay kabanay nga duol pa kay kanako”—Ruth 3:12:
 1. Ning versiculoha ang unang kabanay sa bana ni Ruth, ang labing duol nga kabanay ni Ruth, naghulagway sa natural nga tawo nato, nga dili makatubos ug dili motubos nato sa pagkautangan (sala) sa daang tawo nato (4:1-6).
 2. Si Boaz, nga ikaduhang kabanay sa bana ni Ruth, naghulagway ni Cristo, nga niambit sa dugo ug unod (Heb. 2:14) aron mahimong Kabanay nato ug makatubos nato sa atong sala, makapahiuli sa nawalang katungod sa natural nga tawo nato diha sa kabuhatan sa Dios, mahimong bag-ong Bana nato sa diosnong organicong pagkausa Niya kanato, ug maghimo natong kapikas Niya aron motubo Siya (Ruth 4:7-13).

V. Naghisgot ang capitulo 4 sa basahon sa Ruth sa pagkadawat ni Ruth og ganti alang sa pamatigayon sa Dios:

- A. Isip bahin sa ganti ni Ruth alang sa pamatigayon sa Dios, nakabaton siyag banang tigtubos, nga naghulagway ni Cristo nga Banang tigtubos sa mga magtutuo; isip mga magtutuo ni Cristo karon, duna tay Bana nga walay kataposan, naa karon, ug adlaw-adlawng Manunubos nato, nga nagluwas, nagpahigawas nato, sa tanan natong kasamok.
- B. Gawas sa pagkabaton og banang tigtubos, gitubos si Ruth gikan sa pagkautangan sa iyang bana nga namatay (vv. 1-9); naghulagway kini sa mga magtutuo nga gitubos gikan sa sala sa daang tawo nila:
1. Matod pa sa Roma 6:6 ug 7:2-4, ang bana nga namatay, ang daang bana nato, mao ang daang tawo nato; gilalang ta sa Dios aron mahimong asawa Niya, apan nisupil ta Niya; gisalikway nato Siya ug nagpaka-bana ta.
 2. Giluwanan ta sa masal-anong bana nato og daghang utang, apan sa adlaw nga naminyo ta ni Cristo, nakadawat tag Bana nga mao ang makagagahom-sa-tanan, makahimo-sa-tanan nga Manunubos nato; nagkinahanglan tang tanan ni Cristo nga mahimong ingon niana nga Bana nato, ug batasanon gyod nato nga moduol Niya ug moingon lang nga, “Ginoong Jesus, nagkinahanglan ko Nimo.”
- C. Ang usa pa ka aspeto sa ganti ni Ruth mao nga nahimo siyang mahinungdanong gigikanan sa talaan sa mga ginikanan nga nagpadangat sa harianong balay ni David aron magpalugwa ni Cristo (Ruth 4:13-22; Mat. 1:5-16); nagpakita kini nga duna siyay malangkobon-sa-tanan ug masangkaron-sa-tanan nga nabatonan nga dunay posisyon ug kahimoan nga magpadangat ni Cristo nganha sa kaliwat sa tawo; sa ingon niana dakong kadugtongan siya sa linya nga magpadangat ni Cristo sa tanang suok sa yuta.
- D. Dili lang nga nahimong mahinungdanong gigikanan si Ruth sa talaan sa mga ginikanan nga nagpadangat ni Cristo, kondili gipadayon sab niya ang linya sa katawhang linalang sa Dios alang sa pagpakatawo ni Cristo; ang pagpakatawo ni Cristo kalabot man sa pagdala Kaniya gikan sa eternidad nganha sa panahon ug uban sa Iyang pagkadios nganha sa tawo:
1. Sumpay gyod unta sa pagpakatawo ni Cristo ang matag adlaw sa Cristohanong kinabuhi nato, ipadangat si Cristo aron mahimugso nganha sa uban sa pagpangalagad nato Kaniya nga Espiritu ngadto nila—2 Cor. 3:6.
 2. Aron mahitabo kini, mamulong gyod tang tanan alang ni Cristo, mamulong og Cristo, ug ipamulong ni Cristo ngadto sa uban; ang pagpangalagad nato ni Cristo sa ingon niini metabolico gyong mousab nato ug sa mga giatiman nato aron matransporma ta ngadto sa Iyang dagway—v. 18; 4:1.